



Ün edifizì da lain sülla piazza da scoula – uschè as preschantarà la nouva butia da Ramosch (illustraziun: Bien GmbH).

Valsot

Ün milliun per üna nouva butia

Politik 11.12.21 Ramosch Valsot

La radunanza cumünala dal cumün da Valsot ha acconsenti in marcurdi saira ün credit dad ün milliun francs per realisar üna nouva butia pella fracziun da Ramosch.

Dürant la stà 2022 vess la nouva butia – in lain – da gnir fabrichada, schi va tenor il giavüsch dal cumün. L'avertüra füss previsa il plü tard da prümavaira dal 2023. Il stabilimaint nouv vess lura da spordscher piazza per la posta ed ün pitschen café. Per pudair realisar quist proget metta il cumün a disposiziun uossa raduond ün terz da la piazza da scoula. Culla scoula da Ramosch as prevezza da far müdada illa scoula da Strada.

Il cumün da Valsot fabricha l'edifizì e til dà lura a fit a Wanda Hopmann chi maina fingià hoz la butia da mangiativas a Ramosch. La butia existenta es in possess privat, il contrat cul possessur scrouda sülla fin dal mais marz 2023.